

Letsogo le le telele la molao le swere dinokwane ka morago ga mengwaga ye 8 di tšhabeša

Tshwane, 31 Matšhe 2021 – Khomišinare wa Ditirelo tša Motšhelo tša Afrika Borwa (SARS) Edward Kieswetter o amogela go tshwarwa ga bagogelgwa ba babedi ba bomenetša bja VAT bao ba bego ba gopola gore ba phonyokgile toka ka go tšhabeša sebaka sa mengwaga ye seswai.

Moofisiri yo e bego e le mošomi wa kgale wa SARS, Rudi Willemse, le baeletši ba ba bedi ba ditšhelete, Hein Fourie le Abraham van Wyk, ba ahloletšwe ka Kgorotsheko ya Maserata ya ka Klerksdorp ka la 30 Julae 2004 ka mengwaga ye meraro ya kgolego ka tatofatšo ya bomenetša, Maserata o ile a laetša gore kahlolelo e sepetšwe sammaletee le molatofatšwa yo mongwe le yo mongwe ka kgolego thwii ya mengwaga ye šupa.

Mathomong e go be go golegilwe bagononelwa ba šupa, go akaretšwa le baofisiri ba ba raro ba ka SARS. Le ge go le bjale, ditsheko dibe di arogantšwe morago ga ge ba bane ba balatofatšwa ba ile ba ipona molato, mola Willemse, Fourie le Van Wyk ba ile ba se ipone molato.

Molato wo o be o ama tefelamorago ya kleimi yeo e sego ya nnete ya VAT ya boleng bja R2.7 million yeo e rometšwego legatong la setheo seo se bitšwago Elandslaagte Mining ka Klerksdorp. Kleimi e be e rometšwe bakeng sa tatofatšo ya theko ya didirišwa tša maene tšeo di sa kago tša rekwa gomme baofisiri ba ka SARS ba ile ba fiwa pipa molomo go dumelela tefelamorago.

Willemse, Fourie le Van Wyk ba dirile kgopelo ya llifi go dira boipiletšo bja dikahlolelo tša bona, tšeo ba šetšego ba di hweditše. Tshepetšo ya boipiletšo e tšere mengwaga ye mmalwa gore e phethagatšwe, eupša ka 2011 ka Kgorotsheko Kgolo ya ka Leboa la Gauteng ka Pretoria e ganne boipiletšo bja dinokwane tše tharo.

Ka 2013 Kgotlakgolo ya Boipiletšo ka Bloemfontein gape e ganne boipiletšo bja Willemse, Fourie le Van Wyk. Ditaetšo di filwe go balatofatšwa ba ba rato go bega ka go Kgoro ya Ditirelo tša Dikgolego go thomiša ka kgolego ya mengwaga ye šupa. Balatofatšwa ka boraro bja bona ba hlolegile go bega ka go Kgoro ya Ditirelo tša Dikgolego, gomme se se feditše se bakile go ntšhiwe tagafala ya kgolego ya boraro bja bona.

Go tloga ka 2013 go be go tloga go sa phomelelwe ka maitekelo a go latediša Willemse, Fourie le Van Wyk. Se se akaretša go iša dinokwane tše tše tharo ka go phatlalatšo ya mokgwatšhomo wa SAPS. Le ge go le bjale, go be go tlhomilwe gore o tee ba dimenetša, Abraham van Wyk, o ile a hlokofala.

Mafelelong, ka Matšhe 2021, dimenetša tše pedi tšeo di šetšego, Rudi Willemse le Hein Fourie, ba ile ba hwetšwa ke maphodisa a ka go Yuniti ya Tatedišo ya ka Klerksdorp gomme ba ile ba golegwa. Mengwaga ye lesomešupa morago ga dikahlolelo tša bona, le mengwaga ye seswai ga timeletše, Willemse le Fourie gabjale ba tlhahletšwe kgolegong sebaka sa mengwaga ye šupa ka go Kgoro ya Ditirelo tša Dikgolego ka Klerksdorp.

Khomišinare Kieswetter o rile, “SARS e ikemišeditše go tiišetša dirito tša bašomedi ba rena ga di na bosodi gomme re tla lwantšha ditiro dife goba dife tša bosenyi ka lehlakoreng la bašomedi ba ka SARS gomme badudi bao ba lekago go forenyaka ditšheletše tšeo di hlokegago tša ditseno. Setšhaba sa Afrika Borwa se tloga se beile tshepho go bašomedi ba SARS go tšweletša mešomo ya bona ka bothakga le botshephegi gomme ditiro Mrn. Willemse di tloga di bekile tshepho yeo”.

Ditseno tšeo di kolekwago ke SARS di raloka karolo e kgolo kudu go thuša go aga naga yeo e fanago ka ditirelo tša bohle go setšhaba ka bophara kudu, dihlopha tšeo di ihlokelago gape le go reka diphepo tša kalafo mo nako ye ya leuba leo le sa ntšego le tšwelapele la Covid-19.

Mrn. Kieswetter o tlaleleditše ka gore SARS moragorago e thomile go hira batho bao ba nago le mabokgoni a boleng go thuša go tsošološa bokgoni bja setheo bja go thibela go šwatlha ga ditseno le go thibela bomenetša bja motšhelo le khastomo gore bo se tšwelele.